

# In onuraivel engaschament per Christian Klucker

■ (sk) Il dirigent da blers onns da l'ensemble vocal Incantanti, Christian Klucker, surpronda l'incumbensa sco dirigent giastant dal Chor da giuvenils Svizzer e dal Grond Chor da l'Academia da musica da Basilea.

L'ensemble vocal Incantanti po cuminatar cun plaschair e luschezza ch'il fundatur e dirigent dal chor da giuvenils, Christian Klucker, è vegnì tschernì e dumandà gist da duas renumadas instituziuns naziunalas da surpronder l'incumbensa sco dirigent giastant. Igl èn quai il Chor da giuvenils Svizzer ed il Grond Chor da l'Academia da musica da Basilea. «D'esser vegnì dumandà sco dirigent ospitant d'omadus chors è ina grond'onur per mai ch'empermetta da daventar in'experientscha immens captivanta», conceda Klucker.

## Ina nova dimensiun

L'incumbensa da Klucker tar il Grond Chor da l'Academia da musica da Basilea cumpeggia da manar 55 studentas e students da la musica sco er da planisar e direger il concert final dals 15 da matg en la sala gronda da l'Academia da musica da Basilea. Sut il motto «Dal Grischun or en il mund» ha preparà Klucker in program da concert particular cun ils students basileis. Sut l'aspect dal barat cultural vegnan a resunar chanzuns popularas rumantschas, talianas e franzosas chantadas a capella. «Da collavurar cun musicistas e musicists professiunals è ina lezia captivanta che m'avra novas dimensiuns», sa legra Klucker da sia rolla sco dirigent giastant dal chor basileis.

Tar il Chor da giuvenils Svizzer – quasi la squadra naziunala da chant choral – surpronda Klucker entant la



Christian Klucker, il dirigent da l'ensemble vocal Incantanti, è daventà dirigent ospitant da dus renumads chors da giuvenils svizzers.

MAD

part grischuna pertutgant la registraziun dal nov disc cumpact Swissness da la furmazion da chant da Nikolaus Fink. Per questas registraziuns, ch'han lieu il november da quest onn exercitescha e prepara il manader dals Incantanti cun stgars 50 chantaduras e chantadurs giuvenils da tuttas parts dal pajais tranter autras ovras da Tumasch e Benedetg Dolf, da Gion Balzer Casanova e Gion Andrea Casanova sco er dad Oreste Zanetti.

## In losch ensemble

Chantaduras e chantadurs da l'ensemble vocal Incantanti sa legran che lur dirigent da blers onns è vegnì nominà per las duas prestigiusas incumbensas da dirigent ospitant ed al gratuleschan persuerter. En il medem temp èn els loschs da pudair collavurar cun in dirigent da success e tant experientà e dumandà.

Pertutgant l'avegnir: Davent dal schaner 2020 èsi puspè posts libers en l'ensemble vocal Incantanti. Per dar in'im-

pressiun, co i vegn lavurà en il chor, envida Incantanti chantaduras e chantadurs interessads ad ina prova d'emprova ch'ha lieu ils 17 da matg a las 19.30 en chasa da scola Quader a Cuira nua ch'ins po emprender ad enconuscher il chor e po sa laschar incantar dal chant communabel.

Gia ils 12 da matg po vegnir guardà la preschentaziun d'Incantanti sin Star TV. El è il chor giastant a chaschun da la surdada dal Premi Walo.